

CONTRIBUCION

Idèas per la revista

Tèma : Revista

Autor : *David Grosclaude*

Constatacion

La situacion qu'ei clara : la revista papèr demanda hòrt (*tròp*) d'energia e (*tròp*) de moneda e que se'n ved entà trobar abonats qui pagan. La rason qu'ei dobla :

1. Lo papèr com supòrt d'informacion qu'a perdut hòrt de la soa pertinéncia concurrenciat qui ei per lo numeric.

2. Lo papèr qu'a un còst important e que pausa problèmas divers com per exemple :

2.1 lo maquetatge

2.2 l'impression

2.3 lo mandadís a un prètz abordable.

Qu'ei shens comptar la demanda d'energia militanta necessària com per exemple la deu maquetatge qui non pagam pas o com lo tribalh de gestion deus abonats (*pauc nombrós*). De mei qu'èm acarats au cambiament de las règlas deu jòc de la CPPAP qui empacha la nosta revista de profieitar deus prètz preferenciaus.

Notem enfin qu'ua revista qui pareish un còp cada dus o tres mes, non pòt estar ua revista

portaira d'informacions « caudas ». La periodicitat qu'ei ua de las rasons de la manca d'interès de las parts deus lectors. Dab mensh de 200 abonats (*e au demiei quantes qui pagan ?*) la revista que la pagam a huec d'argent ! N'ei pas mei possible de tièner aquera jòga.

Proposicion

La proposicion de cambiament qui hèi que pren en compte quates causas :

- La necessitat de manténer l'escriut com supòrt de las nostas proposicions dab ua preocupacion per la qualitat de las contribucions ;

- La presa en compte de la plaça presa peu numeric com mejan de transmission de l'informacion ;

- La necessitat de publicar causas qui son legidas per lo mei gran nombre en tot demorar d'un bon nivèu. Que significa non pas sacrificar lo hons a la fòrma ;

- Deishar ua possibilitat a'us qui ac vòlen de recèber un supòrt escriut sus papèr.



Que prepausi donc :

La creacion d'un blòg qui serà la revista deu POC. Que i poderàn accedir gratuïtament tots los qui ac vòlen mes la redaccion que serà assegurada peu POC e sonque.

Que i aurà un responsable de las publicacions e qui aurà la man suu blòg. Que podem imaginar d'establir règlas de redaccion pertocant la fòrma com per exemple limitar los articles a 3000 signes (*la lisibilitat qu'ei en jòc*). Que vau mei dus article legits que un tròp long qui n'ei pas legit .

La necessitat aboluda per tot redactor de hornir ua illustacion (*fòto o auta, libra de drets*) . Los articles que serén publicats au briu de l'aiga dab un minimum de un per setmana.

Article bracs que serén tanben los planvienguts (*petitas informacions e cronicas diversas com per exemple suus libes o autas tematicas*).

Ua atencion serà portada a un equilibri enter los articles en occitan e los articles en francés.

Version imprimida

Ua version imprimida que poderé estar enviada cada dus mes a las personas qui ac desiran mes que deverén pagar lo còst de l'impression e deu mandadís. Aquò que necessita qu'ua persona s'encargue de la causa.

La version imprimida que serà lo tribalh realizat per l'ADEO qui deu demorar viva. Que podem imaginar tanben la publicacion un còp per an, per soscripcion, d'ua compilacion deus articles de hons mei pertinents. Que seré la pèira portada a la reflexion politica sus tematicas qui non son pas dependentas d'ua actualitat cambiadissa.

L'impression numerica que permet aquerò a un prètz corrècte e dab ua qualitat pro bona. Que demanda tanben un investment militant.

De segur se l'accès a la revista numerica serà gratuit que i averà sistematicament ua demanda de sostien hèita aus lectors. Sostien au POC e sostien a la revista.